

CONVIVENZA

Mandarinas

BETTINA CADOTSCH

Igl è puspè uschè lunsch: dapertut savuri da mandarinas, clementinas e tangerinas. En tut las butias dattan ellas en egl, damai ch'ellas èn exponidas bain. Mintgamai ils mais d'enviern han las mandarinas stagiun auta tar nus, cunquai ch'ellas vegnan racoltas en pajais mediterrans sco la Spagna u l'Italia.

Is pitschens fritgs oranschs èn per differents motivs enorm populars tar nus umans. Ils fritgs pon ins mangiar senza cuntè, els han ina buna grondezza ed els èn in pau ils emprims segns dal temp d'advent. Jau na sai gea betg co ch'i va cun Vus, ma jau colliesch las mandarinas mintgamai cun Son Niclà che purtava durant l'uffanza in satg cun mandarinas, nuschs e tschigulattas. E quai èn mintgamai bellas regurdientschas.

Mandarinas han en mes egl però anc auters avantatgs. La savur dultscha ma fa megra luna durant ils dis grischs e stgirs da november. Jau hai era gugent che la stanza savura adina aromaticamain, cura ch'ins mangia ina mandarina. E naturalmain cuntengnan mandarinas era vitamin C, insatge ch'è durant l'enviern adina bun per corp ed olma.

Avant curt hai jau per quests motivs gist pu-



spè cumprà in entir satg mandarinas e mess el tar mai sin maisa. Cun contemplar ils fritgs è vegnida endament a mai in'istorgia che nus avain legì ina giada en scola. Jau vi parter ella cun Vus en ina versiun scursanida.

Isa tracta dad in mat-tatsch che abitava en ina chasa d'orfens. Mintgamai da Nadal survegnivan tut ils uffants ina mandarina dultscha sco regal. Cunquai ch'il mattatsch ha però vulì fugir in di da la chasa d'orfens, n'ha el survegnì nagina mandarina. Sco sulet uffant da l'entira chasa steva el en il rudè cun mauns vids. Tut trist è el sa retratg en sia chombra ed ha bragì pitras larmas.

Suenter in mument è ses meglier ami cumparì cun ina mandarina. Igl era ina mandarina tut speziala. Ella era gia spaletschada, enturn enturn aveva ella ina corda che tegneva ensemble ils tocs. L'ami ha de-

clerà ad el che tut ils uffants hajan dà mintgin in toc da l'atgna mandarina, uschia ch'igl haja la finala dà in'entira. Il mat bragiva anc adina – però uss eri larmas dal plaschair.

L'istorgia mussa exemplaricamain che nus umans pudain effectuar ina massa cun far pauc. Nus pudain dar giu insatge senza propi perder insatge. Nus pudain desister d'insatge, senza ch'i fetschia mal a nus – e la finala hai tuttina in bun effect. Jau chat quai er ina bellezza istorgia per mussar ad uffants che parter na fa betg mal – il cuntrari – che parter fa era cuntent.

Naturalmain ch'i n'è en la vita betg adina tut uschè simpel sco en il cas da quest exempel. Tuttina pens jau che parter dapli faschess bain al mund, a nus e surtut er a la glieud che n'ha betg tant. Jau spesesch che questa istorgia vegnia endament er a Vus l'autra giada che Vus mangiais ina buna e dultscha mandarina e che Vus pensias al parter.

Bettina Cadotsch è creschida si a Savognin. Ella ha studegià Multimedia Production a la Scola auta specialisada dal Grischun a Cuir e lavura ussa tar Radio Südschweiz, «suedostschweiz.ch» e la «Südschweiz».

La convivenza da las linguas e culturas en il Grischun – quai è il tema da la rubrica «convivenza». Quella cumpara mintga glindesdi en La Quotidiana ed en la Südschweiz.